



ГАМШГИЙН ЭРСДЭЛИЙГ БУУРУУЛАХ
ҮНДЭСНИЙ ЗӨВЛӨЛИЙН
ЗӨВЛӨМЖ

2020 оны 12 сарын 18 өдөр

Дугаар 01

Улаанбаатар хот

Гамшгийн эрсдэлийг бууруулах үйл ажиллагааг
эрчимжүүлэх тухай

Гамшгийн эрсдэлийг бууруулах үндэсний зөвлөлийн 2021 оны үйл ажиллагааг Монгол Улсын гамшгийн эрсдэлийг бууруулах, шинэ эрсдэл үүсэхээс урьдчилан сэргийлж, гамшигт ялангуяа хүний гоц халдварт өвчний цар тахлаас хүн амыг хамгаалах, нийгэм, эдийн засагт үзүүлж байгаа хохирлыг бууруулахад чиглүүлэх зорилгоор тус зөвлөлийн гишүүдийн саналыг үндэслэн ЗӨВЛӨМЖ болгох нь:

Нэг. Гамшгийн эрсдэлийг бууруулах үндэсний зөвлөлийн гишүүдэд:

1.1. Коронавируст халдвар (КОВИД-19)-ын цар тахлын үргэлжлэх хугацаа тодорхойгүй, цаашид даамжирч болзошгүй нөхцөл байдал, эрсдэлээс урьдчилан сэргийлэх, бууруулах, түүнтэй тэмцэх бэлэн байдлыг хангах чиглэлээр:

1.1.1. Коронавируст халдвар (КОВИД-19)-ын цар тахлын хүн ам, нийгэм-эдийн засагт учруулж болзошгүй сөрөг нөлөөг бууруулах, хохирол багатай даван туулахад Гамшгаас хамгаалах тухай хууль, Коронавируст халдвар /КОВИД-19/-ын цар тахлаас урьдчилан сэргийлэх, тэмцэх, нийгэм, эдийн засагт үзүүлэх сөрөг нөлөөллийг бууруулах тухай хууль болон Улсын Их Хурал, Засгийн газар, Улсын онцгой комиссын холбогдох шийдвэрийн хэрэгжилтийг хангаж ажиллах;

1.1.2. Бүх шатны төрийн болон нутгийн захиргааны байгууллага, хуулийн этгээд коронавируст халдварын цар тахлын үед эрсдэлийг бууруулах менежментийг үйл ажиллагаандаа нэвтрүүлж, эдийн засаг, бизнесийн тогтвортой байдлыг хангах, гэр бүлийн эрх ашиг, эмзэг бүлгийн иргэдийг хамгаалах, дэмжлэг үзүүлэх арга хэмжээг авч хэрэгжүүлэх;

1.1.3. Коронавируст халдвар (КОВИД-19)-ын цар тахлын Монгол Улс дахь нөхцөл байдал, хариу арга хэмжээний явцын 2020 оны тайлан, мэдээг боловсруулж, мэдээллийг олон нийтэд хүртээмжтэй хүргэх.

1.2. Гамшгаас хамгаалах үйл ажиллагаа, хүний гоц халдварт өвчний үед шуурхай хариу арга хэмжээ авах салбар дундын харилцан ажиллагаа, чадавч, нөөц, бэлэн байдлыг дээшлүүлэх зорилгоор Гамшгаас хамгаалах тухай хуулийг хэрэгжүүлж, төрийн захиргааны төв болон нутгийн захиргааны байгууллагуудад гамшгаас хамгаалах асуудал хариуцсан орон тооны мэргэжилтнийг батлагдсан төсөв, орон тоонд багтаан нэн яаралтай томилон ажиллуулах;

1.3. Газар хөдлөлтийн аюулаас урьдчилан сэргийлэх Байнгын ажиллагаатай зөвлөлийн үйл ажиллагаанд дэмжлэг үзүүлэн ажиллах.

Хоёр.Байгаль орчин, аялал жуулчлалын яаманд:

2.1.Уур амьсгалын өөрчлөлтөд дасан зохицох замаар гамшгийн эрсдэлийг бууруулах, ой, хээрийн гал түймрээс урьдчилан сэргийлэх, хяналт шалгалтыг сайжруулах чиглэлээр төсөл, хөтөлбөр, судалгааны ажлын санал боловсруулах (Онцгой байдлын ерөнхий газартай хамтрах).

Гурав.Барилга, хот байгуулалтын яаманд:

3.1.Объектын гал түймэрт тэсвэртэй барилга байгууламж, стандарт нормыг баримтлах хяналтыг эрчимжүүлэх төлөвлөгөө гарган ажиллах, олон нийтийн барилга байгууламжийн норм, дүрмийн дагуу хот суурин газарт объектын гал түймрийн үед ашиглагдах усны цэгийн байршлыг нэмэгдүүлэх, тэмдэгжүүлэх;

3.2.Нийслэл болон үерийн эрсдэл өндөр аймгуудад үерт тэсвэртэй барилга байгууламж, авто болон төмөр замын дэд бүтцийг хөгжүүлэх, ус зайлуулах далан, суваг, шуудууг шинэчлэх, шинээр байгуулах ажлыг төлөвлөн үе шаттай хэрэгжүүлэх (аймаг, нийслэлийн Засаг даргатай хамтрах);

3.3.Баруун, зүүн, төвийн бүсийн тулгуур төв хотууд, Улаанбаатар хотын хөгжлийн ерөнхий төлөвлөгөө, шинэ, хаяа дагуул хот болон бүх хот суурин газрын хөгжлийн төлөвлөгөө, хэсэгчилсэн ерөнхий төлөвлөгөөний баримт бичгийг боловсруулахад гамшгийн эрсдэлийн үнэлгээнд суурилах, олон улсад хэрэгжсэн судалгаатай, үр дүнтэй арга хэмжээг жишээ болгож, эрсдэлээс урьдчилан сэргийлэх арга хэмжээг тусгах (аймаг, нийслэлийн Засаг даргатай хамтрах).

Дөрөв.Гадаад харилцааны яаманд:

4.1.Гамшгийн эрсдэлийг бууруулах олон улсын болон бүс нутгийн платформуудын үйл ажиллагаанд идэвхтэй оролцож, сургалт, судалгаа, техникийн туслалцаа авах зэргээр үндэсний зөвлөлийн чадавхыг нэмэгдүүлэхэд дэмжлэг үзүүлэх;

4.2.Үндэсний зөвлөлийг бүс нутаг, дэлхий дахинаа гамшгийн эрсдэлийг бууруулах, түүний эдийн засагт нөлөөлөх нөлөөллийг тооцоолох чиглэлээр баримталж буй бодлого, чиглэл, цаг үеийн мэдээ, гадаад улсын ижил төстэй байгууллагын туршлагын талаарх мэдээллээр хангах.

Тав.Зам, тээврийн хөгжлийн яаманд:

5.1.Гамшгийн үед ашиглагдах туслах замуудын зураглалыг тогтмол шинэчлэх, нэн шаардлагатай түргэн тусламж, гал, аврах ангийн автомашин саадгүй орж ажиллах нөхцөлийг бүрэн бүрдүүлэх. Үүнд: хаягжилт, зураглалыг тодорхой болгох, GPS-д мэдээллийг тогтмол шинэчлэх (аймаг, нийслэлийн Засаг даргатай хамтрах);

5.2.Улсын чанартай авто болон төмөр замын дэд бүтцэд хийгдсэн үерийн эрсдэлийн ерөнхий үнэлгээний дүнд үндэслэн үерийн гамшигт тэсвэргүй байгаа авто зам, төмөр замын суурь дэд бүтцэд хийх хүчитгэл, шинэчлэлийн ажлын төлөвлөгөө гаргаж, хэрэгжилтийг үе шаттай зохион байгуулах.

Зургаа.Эрчим хүчний яам, Уул уурхай, хүнд үйлдвэрийн яаманд:

6.1.Эрчим хүч, уул уурхай, хүнд үйлдвэрийн салбарт гамшгийн эрсдэлийн үнэлгээ хийж, салбарын хэмжээнд үүсэж болзошгүй гамшгийн эрсдэлийг бууруулах төлөвлөлт хийх.

Долоо.Хүнс, хөдөө аж ахуй, хөнгөн үйлдвэрийн яаманд:

7.1.Хүнсний хангамжийн тогтвортой байдлыг хадгалах, хүнсний гол нэрийн бараа, бүтээгдэхүүний дотоодын үйлдвэрлэл, импортын мэдээ, судалгаанд үндэслэн хомсдол үүсэхээс урьдчилан сэргийлэх талаар эрх зүйн орчныг сайжруулах санал боловсруулах;

7.2.Зудын эрсдэлээс эрт сэрэмжлүүлэх, эрт хариу арга хэмжээ авч хэрэгжүүлэх, малыг эдийн засгийн эргэлтэд оруулах замаар хохирол багатай даван туулахад анхаарч ажиллах;

7.3.Малын халдварт болон гоц халдварт өвчнөөс урьдчилан сэргийлэх, хяналтын постуудын үйл ажиллагааг эрчимжүүлэх, мал эмнэлгийн цахим бүртгэлийн системээр дамжуулан малын эрүүл мэнд, малын гаралтай түүхий эд бүтээгдэхүүний эрүүл аюулгүй байдлыг хянах, баталгаажуулах;

7.4.Малын индексжүүлсэн даатгалын хамрагдалтыг нэмэгдүүлэх хүрээнд уг даатгалын үйл ажиллагаа, түүний ач холбогдлын талаар малчдад таниулан сурталчлах ажлыг аймаг, сумдын холбогдох ажилтан, албан хаагчдын ажил үүрэгт нэмж тусган хариуцлагажуулах, үр дүнг бодитоор тооцох асуудлыг шийдвэрлэх.

Найм.Эрүүл мэндийн яаманд:

8.1.Гамшгийн үед эрүүл мэндийн байгууллагуудын нөөцийн бэлэн байдал (эмнэлгийн барилга байгууламж, хүний нөөц, эм, эмнэлгийн хэрэгсэл, зөөлөн болон хатуу эдлэл, цэвэр ус, цахилгааны найдвартай эх үүсвэр гэх мэт)-ыг ханган ажиллах, нөөцийн бэлэн байдалд байнгын тодотгол хийх, хяналт тавих;

8.2.Эм, эмнэлгийн хэрэгсэл, ариутгалын бодис хадгалах нөөцийн агуулахын барилга барих шаардлагыг нарийвчлан тодорхойлох, хэрэгжүүлэх боломжийг судлах (Барилга, хот байгуулалтын яамтай хамтрах).

Ес.Онцгой байдлын ерөнхий газарт:

9.1.Улсын хэмжээнд гамшгийн шуурхай удирдлагын нэгдсэн төв (хямралын удирдлагын нэгдсэн төв) байгуулах боломжийг судлах;

9.2.Засгийн газрын 2018 оны 335 дугаар тогтоолоор батлагдсан "Гамшгийн эрсдэлийг бууруулах Сендайн үйл ажиллагааны хүрээг Монгол Улсад хэрэгжүүлэх дунд хугацааны стратеги"-ийн хоёрдугаар үе шат буюу 2021-2025 онд хэрэгжүүлэх арга хэмжээний төлөвлөгөө боловсруулах ажлын хэсгийг салбар дундын оролцоотой байгуулж, 2021 оны нэгдүгээр улиралд багтаан төлөвлөгөөг боловсруулж батлуулах. Тус арга хэмжээний төлөвлөгөөнд гамшгийн эрсдэлийг бууруулах асуудлыг тогтвортой хөгжлийн зорилт, уур амьсгалын өөрчлөлтөд дасан зохицох чиглэлээр хэрэгжүүлж байгаа үйл ажиллагаатай уялдуулах, хүүхэд, ахмад настан, хөгжлийн бэрхшээлтэй хүн болон жендэр, хүний эрхийн асуудлыг онцгойлон авч үзэн, холбогдох арга хэмжээг тусгах.

Арав.Хил хамгаалах ерөнхий газарт:

10.1.Хилийн боомтуудад коронавируст халдвар (КОВИД-19)-ын цар тахлаас урьдчилан сэргийлэх, ажиглан тусгаарлах байр байгуулах (Гаалийн ерөнхий газар, Мэргэжлийн хяналтын ерөнхий газартай хамтрах).

Арван нэг.Харилцаа холбоо, мэдээллийн технологийн газарт:

11.1.Харилцаа холбооны үйлчилгээний хүртээмжийг сайжруулах, интернет болон үүрэн холбооны дэд бүтцийг нэмэгдүүлэх, гамшгийн үед шуурхай, баталгаат эх үүсвэрээс олон нийтэд мэдээлэл хүргэх зорилгоор холбоо мэдээллийн салбарт инновацыг хөгжүүлэх (мэдээллийг текст хэлбэрээр шуурхай хүргэх "Cell broadcast message – CBM" систем, гар утасны аппликейшн, контент болон цахим портал хуудсыг бүтээх, хөгжүүлэх, нийтийн хэрэглээнд нэвтрүүлэх).

**Арван хоёр.Үндэсний аюулгүй байдлын зөвлөлийн
Стратегийн судалгааны хүрээлэнд:**

12.1.Хөгжлийн баримт бичигт гамшгийн эрсдэлийг бууруулах арга хэмжээг тусгах асуудлаар судалгаа хийх (Онцгой байдлын ерөнхий газартай хамтрах).

Арван гурав.Шинжлэх ухааны академид:

13.1.Гамшгийн эрсдэлийг бууруулах үйл ажиллагаанд инновацыг нэвтрүүлэх, КОВИД-19 халдварын цар тахлын үед аж ахуйн нэгж, байгууллагын үйл ажиллагааны тогтвортой байдлыг хадгалах үүднээс Гамшгийн эрсдэлийг бууруулах үндэсний зөвлөлийн дэргэд гамшгийн эрсдэлийг бууруулах шинжлэх ухаан, инновацын болон төр, хувийн хэвшлийн түншлэл бүхий хамтын ажиллагааны салбар зөвлөлийг байгуулах талаар судлан танилцуулах (Монголын Үндэсний худалдаа, аж үйлдвэрийн танхимтай хамтрах).

Арван дөрөв.Орон нутгийн зөвлөлийн дарга, гишүүдэд:

14.1.Гамшгаас хамгаалах тухай хуулийн 23 дугаар зүйлийн 23.2 дахь хэсэгт заасны дагуу Гамшгийн эрсдэлийг бууруулах орон нутгийн зөвлөлийг шинэчлэн байгуулах;

14.2.Орон нутагт гамшгийн эрсдэлийг бууруулах арга хэмжээг төлөвлөх, зарцуулах зардлыг 2021 оны орон нутгийн төсөвт тусгаж, хэрэгжүүлэх.

Арван тав.Газар хөдлөлтийн байнгын ажиллагаатай зөвлөлд:

15.1.Гамшиг онцгой байдлын үед хүн амд нэн шаардлагатай тусламж, үйлчилгээ үзүүлэх эмнэлгийн барилга байгууламжид газар хөдлөлтийн эрсдэлийн үнэлгээ хийх, хүчитгэх арга хэмжээг шат дараатайгаар хэрэгжүүлэх.

МОНГОЛ УЛСЫН ЕРӨНХИЙ САЙД,
ГАМШГИЙН ЭРСДЭЛИЙГ БУУРУУЛАХ
ҮНДЭСНИЙ ЗӨВЛӨЛИЙН ДАРГА

